

BOLETÍN SOBRE RESPONSABILIDADE SOCIAL DA Universidade de Vigo

OUTUBRO 2017

PUBLICACIÓN ELECTRÓNICA MENSUAL ELABORADA POLA UNIDADE DE ANÁLISES E PROGRAMAS

As “resistenciais institucionais”, un dos retos para o avance das políticas de igualdade

A investigadora realizou un percorrido polos avances que se produciron neste eido nos últimos 30 anos



Un interrogante pechaba o título da conferencia que a profesora da USC Isabel Diz impartiu este luns na Facultade de CCSS e da Comunicación. *30 anos de políticas de igualdade: unha experiencia de éxito?* era o título deste relatorio no que, tras incidir nalgúns dos avances que se produciron neste eido en España neste período, puxo o acento nos retos que deben afrontar as políticas de igualdade na chamada fase de “posadopción”, a relativa á posta en práctica das medidas legais. Entre eles, a existencia de “resistenciais institucionais” polas que “non se acaban

de poñer en práctica” as medidas recollidas no marco legal.

[+info](#)

Os Martes Saudables chaman a atención sobre a importancia dunha correcta hidratación

Os postos desta iniciativa percorrerán os tres campus da Universidade ata o 12 de decembro



Beber en intervalos regulares e antes de ter sede; tomar líquidos antes, durante e despois do exercicio; tomar uns dez vasos de auga ao día, entre 1,5 e 2 litros... Estas son algunhas das recomendacións sobre hidratación que os membros da comunidade universitaria poden coñecer este cuadrimestre cando se acheguen aos postos dos Martes Saudables. Este martes, esta iniciativa comezou no Edificio Xurídico-Empresarial do campus de Ourense o seu percorrido polos tres campus da Universidade de Vigo facendo fincapé, ademais de na saúde integral a través do deporte, a sexualidade e a alimentación, na importancia concreta da auga para o benestar persoal.

[+info](#)

A comunidade universitaria tamén se anota á moda dos tándem de conversa bilingües



O curso pasado formáronse 65 parellas, a maior parte para practicar inglés/español pero tamén alemán ou francés... e a previsión é que este curso se repitan cifras similares ou lixeiramente superiores. Os encontros para aprender idiomas de xeito informal multiplícanse nas cidades e a comunidade universitaria non permanece allea a esta moda. Impulsados pola Oficina de Relacións Internacionais e a asociación ESN Vigo, Asociación de Apoio aos Estudantes Estranxeiros, hai xa varios cursos que se puxeron en marcha os tándems de conversa, unha opción que pon en contacto estudantes e docentes locais co alumnado internacional.

[+info](#)

O ciclo Pensar o Cine celebra a súa novena edición do 4 de outubro ao 15 de novembro

Oito películas para debater sobre sexualidade, muller e igualdade



As sesións contarán con conferencias de especialistas e mesas de debateAo longo da súa traxectoria, o ciclo Pensar o Cine dedicou, xa sexa de xeito específico ou transversal, unha atención especial á muller e á igualdade desde diferentes ángulos de análise. Nesta liña de compromiso, a novena edición desta iniciativa bota a andar co título *Sexualidade, muller e igualdade*. Do 4 de outubro ao 15 de novembro, a Facultade de Dereito do campus de Ourense acollerá oito sesións nas que, mesturando a proxección de películas actuais, a intervención de especialistas e o debate aberto, se intentará afondar desde diferentes puntos de vista nas problemáticas de xénero relacionadas coa sexualidade presentes na sociedade.

[+info](#)


A aventura da aprendizaxe non entende de idades



Manterse activos, ampliar coñecementos en determinados ámbitos ou compartir traballos e inquiredanzas co alumnado máis novo do campus. Son múltiples os motivos polos que cada curso novos alumnos e alumnas se suman ao programa impulsado pola Universidade para persoas maiores de 55 anos. A falta das incorporacións que se produzan no prazo de ampliación de matrícula que permanece aberto ata 17 de outubro no seu ciclo intensivo, o Programa para Maiores conta este curso con 66 alumnas e alumnas no campus pontevedrés, que esta xornada foron obxecto dun acto de benvida na Casa das Campás.

[+info](#)

Os recursos web para o ensino súmanse as opcións formativas da Aula Tecnolóxica



Un cuatrimestre máis, a Aula Tecnolóxica da Casa das Campás abrirá as súas portas para completar a formación, tanto da comunidade universitaria como do conxunto da cidadanía, en eidos como o deseño web, o tratamento de imaxes e a xestión de redes sociais, con novas edicións dalgúns dos cursos que máis interese despertaron en anos anteriores e aos que se suma como novidade o taller *Iniciación aos recursos web para a educación*. Cun límite de 20 prazas, que se cubrirán por orde de inscrición, a matrícula nestas actividades, de carácter gratuíto, abrírase nos próximos días na plataforma Bubela.

[+info](#)

Bioloxía celebra unha xornada de ecoloxía de ecosistemas acuáticos e plantas exóticas invasoras



Botar unha ollada desde diferentes puntos de vista ás principais causas e consecuencias da introdución de plantas exóticas invasoras nos ecosistemas acuáticos. Este foi o principal obxectivo dunha xornada organizada este mércores na Facultade de Bioloxía polo Laboratorio de Ecoloxía Evolutiva e Conservación en colaboración có Laboratorio de Ecofisioloxía Vexetal, un encontro no que se contou coa participación, ademais de diferentes investigadores da propia Universidade, do profesor brasileiro Leandro Juen, que centrou a súa intervención nos efectos da alteración ambiental na biodiversidade acuática da Amazonia.

[+info](#)

Fotografías que rachan coa orde sexual imposta



Cada unha das 22 imaxes que dende hoxe mércores se expoñen no centro comercial de Cidade Universitaria representa unha visión o máis persoal e íntima posible sobre o xénero e os roles sexuais tradicionais. Tras o obxectivo da cámara están dezaoito estudantes da materia Técnicas Fotográficas do primeiro curso do Grao en Belas Artes, comisariados polos docentes Mar Caldas e Carlos Tejo e co patrocinio da Unidade de Igualdade. *Sen Moldes*.

Comentarios fotográficos sobre os xéneros é unha escolma do traballo realizado por todo o alumnado desta materia, que recolle os traballos máis creativos e rompedores que reflexionan sobre a orde sexual imposta, contrapoñéndolle visións críticas, discrepantes, anovadoras, creativas, diverxentes ou paradoxais.

[+info](#)

O Campus CREA S2i internacionalízase cun proxecto que conecta 15 institucións europeas e americanas



A Universidade de Vigo é unha das 15 institucións de Europa e América Latina que forman parte do proxecto europeo *Lapassion*, que coordina o Instituto Politécnico do Porto e que busca identificar e promover, a ambos lados do Atlántico, boas prácticas docentes vinculadas con proxectos multidisciplinares e de colaboración desenvolvidos polo alumnado nos eidos da creatividade e da innovación social. Dúas liñas de traballo que constitúen o “corazón conceptual” do proxecto de especialización CREA S2i e que motivan que o campus pontevedrés participe de maneira significativa neste proxecto financiado con preto dun millón de euros polo programa europeo Erasmus +. Ao longo dos próximos tres anos, *Lapassion* promoverá a mobilidade de docentes, que contribuirán á formar a investigadores da América Latina nestes eidos, así como estadias de estudantes nas once institucións americanas participantes.

[+info](#)

Vicerreitoría e Concello traballan para organizar en Pontevedra a maior exposición en España da cineasta Agnès Varda



Considerada un dos nomes de referencia da *Nouvelle Vague*, a cineasta Agnès Varda foi recoñecida ao longo da súa traxectoria con premios como a Palma de Ouro de Cannes, o León de Ouro de Venecia ou o César de honor, aos que sumará o Óscar honorífico da Academia de Hollywood. Mais, ademais de cinema, Varda ten destacado pola súa traxectoria como fotógrafa e polo labor como artista plástica que iniciou en 2003. Tres facetas que a Vicerreitoría e o Concello de Pontevedra, coa colaboración tamén da Deputación, traballarán para achegar a Pontevedra, a través dunha exposición que sería a maior dedicada a Varda en España.

[+info](#)

Dista moito a situación xurídica das antigas romanas da das mulleres de hoxe en día?



“Nalgúns temas a muller romana non estaba tan distante da muller actual como se puidera pensar”, asegura a docente e investigadora da Área de Dereito Romano da Universidade de Vigo María José Bravo Bosch, directora académica da xornadas *Muller romana e actualidade: unha visión próxima* que hoxe e mañá se celebran na Facultade Ciencias Xurídicas e do Traballo. Co obxectivo de dar a coñecer como era a situación xurídica da muller na antiga Roma e como é hoxe, investigadoras e investigadores de universidades españolas e estranxeiras presentarán os seus traballos académicos nunhas sesións dirixidas á comunidade universitaria, xuristas e público en xeral e que son unha actividade obrigatoria para o alumnado do primeiro curso do Grao en Dereito.

[+info](#)

Representantes da UE, ONU e especialistas internacionais debaten sobre accesibilidade aos medios de comunicación



En xuño do pasado ano, o profesor da Universidade de Vigo Pablo Romero e os docentes da Universidade Autónoma de Barcelona, Pilar Orero, Anna Matamala e Gian Maria Greco, puxeron un marcha un proxecto de investigación con financiamento da Comisión Europa, que se centra en avanzar na tradución audiovisual e a accesibilidade. O obxectivo do proxecto é fornecer servizos de comunicación que permitan que os medios audiovisuais e internet sexan accesibles para toda a cidadanía na súa vida cotiá, incluíndo as persoas con algún tipo de discapacidade sensorial. Algo máis dun ano despois de arrancar o proxecto, estes investigadores organizan no campus de Vigo a *Media Accessibility Platform International Conference*, o primeiro simposio que reúne en España aos máis altos representantes da UE e da ONU no que se refire á accesibilidade aos medios de comunicación, que arrancou este xoves.

[+info](#)

Alejandro Solalinde, candidato ao Nobel da Paz 2017, denuncia no campus a terrible situación das persoas migrantes



É un dos candidatos ao Premio Nobel da Paz 2017, proposto pola Universidade Autónoma do Estado de México. Polo de agora é unha simple proposta pero para el significa xa o recoñecemento para todas e todos os que, como el, loitan contra as terribles violacións dos dereitos humanos que vive México e un “trancazo” para o Goberno. De visita estes días en España, este xoves achegouse ao campus Alejandro Solalinde, sacerdote católico mexicano defensor dos dereitos humanos das persoas migrantes e director do albergue Hermanos en el Camino, que proporciona asistencia humanitaria, médica e psicolóxica, ademais de orientación, aos migrantes centroamericanos que se xogan a vida no seu camiño cara Estados Unidos.

[+info](#)

Especialistas de diferentes países abordarán no campus o uso didáctico dos dicionarios no século XXI



Diferentes estudos, apunta o profesor de Ciencias da Educación e do Deporte Carlos Valcárcel, teñen sinalado a infrautilización por parte dos usuarios e usuarias das ferramentas lexicográficas, así como as posibles razóns que sustentan este feito, “que van desde carencias na formación escolar das persoas até o xeito en que os dicionarios presentan a información”. Afondar no uso didáctico destas ferramentas, que no século XXI abranguen tamén formatos electrónicos “con novas funcionalidades” será o obxecto central do debate reunirá no campus a preto de 40 especialistas de diferentes países con motivo do III Congreso Internacional Relex.

[+info](#)

A Deputación premia con 5200 euros a incorporación da perspectiva de xénero nos traballos do alumnado



Fomentar a inclusión da perspectiva de xénero nos traballos académicos que se desenvolven na Universidade de Vigo é o propósito co que a Deputación de Pontevedra impulsou o pasado ano os Premios Sofía Novoa Ortiz, dos que este venres anunciaba a convocatoria da súa segunda edición, na que outorgará un total de seis galardóns a proxectos de fin de grao e de fin de mestrado, por un valor total de 5200 euros. Dirixidos ao alumnado dos campus de Vigo e Pontevedra, o prazo de presentación de solicitudes permanecerá aberto ata o vindeiro venres 27 e os e as participantes terán como data límite para a entrega dos traballos o 3 de novembro.

[+info](#)

A Universidade reforza o seu achegamento á empresa nunha nova edición da Finde.U



“Sentímonos obrigados a que as nosas e os nosos egresados accedan de xeito digno ao mercado laboral”, asegurou este mediodía o reitor da Universidade de Vigo, Salustiano Mato, na presentación da segunda edición da Feira Internacional de Emprego Universitario, Finde.U, unha iniciativa que o ano pasado puxo en marcha a institución académica viguesa, xunto ás súas homólogas de Porto e Tras-Os-Montes e Alto Douro, co obxectivo de dar a oportunidade ao seu alumnado e egresadas e egresados de manter contacto directo con empresas que demandan talento universitario. Máis de 65 firmas se prevé que tomen parte na feira, que se desenvolverá os días 17 e 18 de outubro no recinto feiral Exponor de Porto e o 24 e 25 no Ifevi de Vigo. Co apoio da Xunta, o Concello de Vigo, Zona Franca e o Consello Social e a Fundación Universidade de Vigo, a Finde.U conta co patrocinio das empresas Brogwarner, Continental e Efasec.

[+info](#)

Investigadores da Universidade participan nunha xornada de recollida de lixo nunha praia de Redondela



Investigadores da Universidade participaron esta fin de semana nunha xornada de recollida de lixo na praia de Soutoxuste, no concello de Redondela, unha actividade realizada dentro da campaña *1 m2 por las Playas y los Mares 2017* do Proxecto Libera, en colaboración co propio concello redondelán e na que participou como coordinadora local a profesora da Facultade de Bioloxía, Maruxa Álvarez. “Recolléronse preto dun cento de quilos de lixo que van ser empregados para realizar unha análise, tanto cualitativa como cuantitativa, do tipo de refugалlos abandonados nas praias”, explicou a docente.

[+info](#)

O Forum Emprego Universitario arranca con todas as prazas cubertas para preparar o alumnado para a Finde.U



Con todas as prazas cubertas arrancou este luns nos tres campus a décimo sexta edición do Forum Emprego Universitario, un evento que dende 2016 ven formando parte da programación de eventos da Feira Internacional de Emprego Universitario, Finde.U, que se celebra ao longo deste mes en Porto e Vigo. O Forum Emprego convértese así, como explicou ao alumnado asistente a vicerreitora de Estudantes, Dolores González, nunha "xornada complementaria á feira, para que chegedes nas mellores condicións de preparación e sacades o máximo partido da mesma". O Forum Emprego Universitario desenvolverase ata o día 16, con formación en liña con excepción desta primeira xornada que tivo carácter presencial en Vigo e foi seguida por videoconferencia dende os campus de Ourense e Pontevedra.

[+info](#)

Ese 'gran descoñecido' chamado voluntariado europeo



Por segundo ano consecutivo, a asociación ecoloxista Amigos da Terra escolleu este martes o campus de Ourense para celebrar a xornada de peche da súa iniciativa de promoción do Servizo Voluntario Europeo, realizada ao abeiro do Programa Iniciativa Xove da Dirección Xeral de Xuventude, Participación e Voluntariado. Nela, organizacións e persoas interesadas neste tema puideron, ademais de recibir toda a información precisa del, coñecer de primeira man testemuños de persoas que foron ou son voluntarios europeos. "Este servizo é o gran descoñecido para a xente", destacou Patricia Iglesias, responsable de Voluntariado de Amigos da Terra.

[+info](#)

300 profesionais da enfermaría debaten en Ourense sobre como fomentar os hábitos saudables



Cada ano, as Xornadas de Enfermaría de Ourense convocan aos enfermeiros e enfermeiras da provincia co obxectivo de recoñecer e fomentar a investigación no seu eido e abordar en profundidade o debate sobre algún dos retos aos que se enfrontan. Este martes, o campus de Ourense acolleu a décimo segunda edición desta cita, que reuniu a arredor de 300 profesionais e que tivo como lema Hábitos saudables, unha inversión en saúde. Tendo en conta que os hábitos saudables ou a prevención supoñen "unha influencia do 45% nas condicións de saúde dunha persoa, fronte ao 10% que representa a asistencia sanitaria", ao longo da xornada abordouse un abano moi amplo de temáticas arredor do fomento da vida sa, desde a alimentación á saúde mental. O termalismo e o seus beneficios para a saúde foi un dos protagonista da programación.

[+info](#)

O Pergamiño Vindel amósase desde hoxe á beira do mar que o inspirou



Dende hoxe e ata o vindeiro 4 e marzo de 2018 o Pergamiño Vindel amosarase por primeira vez en Galicia. Trala súa localización a principios do século XX por parte do libreiro madrileño Pedro Vindel e a súa adquisición por parte da Morgan Library en 1977, o manuscrito que contén as sete cantigas de amigo do trobador Martin Codax poderá ser admirado polo público á beira do mar de Vigo que o inspirou hai 800 anos. O presidente da Xunta, Alberto Núñez Feijóo, e o reitor da Universidade de Vigo, Salustiano Mato, foron os encargados de inaugurar esta tarde *Un tesouro en sete cantigas*, a exposición que, co Pergamiño Vindel como elemento central, amosa medio cento de pezas, a maior parte delas de arte sacro, de entre os séculos XIII ao XX, complementadas con obras de artistas galegos contemporáneos e estruturadas a partir de cada unha das sete cantigas compostas por Codax.

[+info](#)

Unha rede sobre inmigración afondará no campus na importancia de achegar a investigación á sociedade



“Unha das tarefas máis importantes dun investigador é a divulgación do coñecemento científico, dada a importancia deste para a vida das persoas”, salienta a profesora da Facultade de Ciencias da Educación e do Deporte Margarita Pino, coordinadora das xornadas que, o vindeiro xoves 19, reunirán nesta facultade a investigadores e investigadoras das tres universidades galegas. A Rede de Inmigración, Educación e Sociedade (RIES) abordará nesta xornada os diferentes recursos e ferramentas que os investigadores e investigadoras teñen á súa disposición para facer chegar os seus traballos á sociedade.

[+info](#)

Un taller internacional facilita o encontro entre empresas e alumnado de mestrados de matemáticas



Un taller practico no que ao longo dunha semana se recrea unha contorna laboral na que o alumnado de mestrados con formación matemática traballe sobre retos concretos formulados polas empresas e que as matemáticas conseguiron resolver. Isto é o que se propón na IV Semana Ibérica de Modelización, un encontro que se celebrará no edificio Miralles entre o 16 e o 20 de outubro e no que participarán estudantes españois e portugueses que están a piques de saír ao mercado laboral.

[+info](#)

Vigo, referencia española en acreditación do profesorado para a docencia en inglés



A proba HELA -Higher Education Lecturing Accreditation- da Universidade de Vigo, que acredita ao profesorado para a docencia en inglés, foi a elixida pola Universidad de Granada para realizar a acreditación do seu profesorado, solicitando, ademais, que fose o propio persoal do Centro de Linguas da institución académica viguesa o que se desprazase ata Andalucía para examinar alí aos 36 docentes que participaron nesta primeira convocatoria de exames da UGR.

Granada convértese así no primeiro centro de ensino superior en adoptar a proba viguesa como acreditación oficial, pero o interese por este sistema chegou xa dende diferentes universidades, tanto españolas como estranxeiras.

[+info](#)

A EE Forestal pon en valor a súa implicación co plan da ONU para unha economía verde



No ano 2008, a O Fao e Unece impulsaron a conmemoración da Semana Forestal Europea co propósito de incrementar a visibilidade do sector e incidir na importancia dos bosques en diversos eidos. Cinco anos despois, promovían a aprobación do plan de acción para o sector forestal nunha economía verde, un conxunto de medidas dirixidas a contribuír á transformación do sector, ao que se adheriu á Escola de Enxeñaría Forestal. Coincidindo coa avaliación intermedia

deste proxecto das Nacións Unidas e coa conmemoración desta semana, o centro do campus fai tamén balance da súa contribución, nos eido científico e formativo, á estratexia da ONU.

[+info](#)

Ateneo e Vicerreitoría impulsan un club de lectura




Unha reunión mensual para debater e analizar unha obra literaria, aberta tanto aos socios e socias do Ateneo e aos integrantes da comunidade universitaria como á cidadanía en xeral. Esta é a nova proposta cultural que veñen de articular o Ateneo de Pontevedra, a Vicerreitoría do campus e a Asociación de alumnado sénior do campus de Pontevedra Asaexs. Baixo a coordinación das directivas do

Ateneo Carmela Lazcano e Carmén Durán, este club de lectura desenvolverá as súas reunións o primeiro martes de cada mes ás 20.00 horas na Casa das Campás e porase en marcha o vindeiro 7 de novembro cunha primeira xuntanza.

[+info](#)

A Semana de Recollida de RAEE alcanza a súa quinta edición



Os RAEE, residuos de aparellos eléctricos e electrónicos, constitúen tanto unha lista de dispositivos presentes nun amplo número nos fogares e centros de traballo como uns materiais contaminantes que precisan dun tratamento adecuado e que non deberan rematar nos colectores do lixo. Partindo desa idea, a Vicerreitoría do campus impulsou, hai dous anos, dentro do proxecto Green Campus, a Semana de Recollida de RAEE, que este luns dá comezo á súa quinta edición instalando puntos de recollida nas diferentes facultades e escolas do campus pontevedrés, así como na Casa das Campás e no Pavillón Universitario.

[+info](#)

Belas Artes, única representante española nun encontro internacional en Holanda



Unha semana para compartir experiencias e modos de traballo con artistas novos de diferentes puntos de Europa, pero tamén para comezar articular proxectos colectivos que logo se plasmarán nun calendario de exposicións. Iso foi o que supuxo para catro estudantes de Belas Artes o encontro internacional *Apprentice/Master*, que ao longo da pasada semana se desenvolveu na localidade holandesa de Tillburg. Raquel Fernández, Ana Pérez Valdés, Diego

Pazó e Brais Romero foron os catro alumnos seleccionados pola facultade para representalos neste evento, no que Vigo foi a única universidade española representada no evento.

[+info](#)

Un percorrido polo Ribeiro e un baño nas termas de Prexigueiro para arrancar con bo pé as rutas culturais



O sábado 21 de outubro a programación de roteiros que este curso organiza a Área de Benestar, Saúde e Deporte da Universidade de Vigo bota a andar e farao cun percorrido "polo corazón do Ribeiro". Coa inscrición aínda aberta tanto para os membros da comunidade universitaria interesados como para a cidadanía en xeral, as persoas que se apunten realizarán unha excursión pola contorna de Castrelo de Miño que lles permitirá coñecer a riqueza natural, cultural e

vitivinícola desta zona. O traxecto rematará cun baño nas termas de Prexigueiro.

[+info](#)

O Festival de Cine Internacional de Ourense presenta o seu primeiro Xurado Universitario



Este martes o Festival de Cine Internacional de Ourense presentou o seu primeiro Xurado Universitario, que estará formado polos estudantes da Universidade de Vigo Cora Diz, Rebeca Lar, Ricardo Araújo, Nicolás Pérez e Lucía Estévez. A creación do Xurado Universitario está enmarcada no convenio de colaboración que o Concello de Ourense e a Universidade de Vigo asinaron recentemente para achegar a cultura cinematográfica á mocidade universitaria durante a 22ª edición do certame, que se celebrará do 20 ao 27 de outubro.

[+info](#)

Cristina Pato dirixe 'O Pergamiño Vindel: unha viaxe musical', un espectáculo de fusión para o concerto de Nadal



A gaitera Cristina Pato será a protagonista do concerto de Nadal da Universidade de Vigo, que este ano renderá homenaxe ao Pergamiño Vindel, co gallo do seu regreso á cidade, onde permanecerá ata o vindeiro mes de marzo de 2018. *O Pergamiño Vindel: unha viaxe musical* é o título do espectáculo que a gaitera dirixirá e no que fará un percorrido polas numerosas viaxes do pergamiño ata chegar, oito séculos despois da súa creación, ao mar de Vigo. Cun formato que mestura o concerto e a conferencia e que inclúe sete arranxos das cantigas orixinais realizados por recoñecidos artistas galegos procedentes de estilos como o jazz, a música antiga ou a tradicional, o espectáculo enlazará a música con pequenas conversas, en formato entrevista, con expertos na obra de Martin Codax.

[+info](#)

Cóbado con cóbado para resolver con matemáticas problemas reais da industria



Vinte alumnas e alumnos chegados desde as universidades de Porto, Compostela, Valladolid, Valencia e Vigo traballando cóbado con cóbado con docentes universitarios que exercen como titores e técnicos de empresas para solucionar, a través das matemáticas, problemas reais da industria. Nisto consiste a IV Semana Ibérica de Modelización, un encontro que estaba previsto inaugurar onte luns no edificio Miralles pero que, debido á vaga de lumes que sufriu Galicia desde a madrugada deste domingo, foi adiado ata hoxe martes. A apertura do encontro estivo precisamente marcada polas referencias a estes trágicos sucesos.

[+info](#)

Investigacións sobre cancro, inmunoloxía e nanotecnoloxía centran o I Annual Meeting de Cinbio



Cun día de retraso pola vaga de incendios que asolou Galicia, este martes arrancou a primeira Annual Meeting do Cinbio, Centro de Investigación Biomédica da Universidade de Vigo. 130 persoas de toda Galicia participan nesta primeira xuntanza que nace co espírito de converterse nunha cita anual e que nesta ocasión ten como temas centrais o cancro, a inmunidade e a inflamación e a nanotecnoloxía. En total ao longo de dous días, presentaranse 21 ponencias, tanto de especialistas do propio Cinbio como de institucións alleas de España, Canadá, Reino Unido ou Alemaña. A coordinación da conferencia anual correu a cargo de investigadores de post-doutoramento, algo que segundo destaca África González, directora do Cinbio, “redunda en crear un equipo activo e implicado tanto na investigación como na divulgación”.

[+info](#)

Os xoves son do Vindel



Organizado polo Departamento de Filoloxía Galega e Latina da Universidade de Vigo, o vindeiro 19 de outubro arranca o ciclo de conferencias *Os xoves do Vindel*, unha iniciativa coordinada pola catedrática emérita Camiño Noia. Seis relatorios conforman o ciclo de conferencias dirixidas “no só ao alumnado universitario, senón ao alumnado e profesorado de bacharelato, e ao público en xeral, aos que recomendamos asistir ás conferencias porque nelas van recibir de primeira man- e dos mellores especialistas-, os contidos máis amenos e actualizados sobre cada un dos temas”, explica Xosé-Henrique Costas.

[+info](#)

Relendo a literatura infantil desde unha perspectiva de xénero



“A tradición oral é clave para a transmisión de aprendizaxes e a construción do imaxinario colectivo. Os contos enchen as nosas vidas tanto en espazos de aprendizaxe formal como no cotián a través da oralidade e dos medios audiovisuais. Por isto, consideramos imprescindible deconstruír o imaxinario heteropatrinal, capacitista, especista, etnocentrista e capitalista, entre outras cuestións. Pensamos que é importante visibilizar outros modelos existentes que poñan en valor a diversidade”. Con estas premisas, a Asociación Universitaria de Ciencias da Educación Auce celebrará a finais de outubro unha nova edición do seu Obradoiro Contos ConSenso: Contos con Perspectiva de Xénero.

[+info](#)

A segunda edición da Finde.U comezou en Porto con máis de 3000 oportunidades de emprego e prácticas



O centro de congresos de Exponor en Porto acolle ata hoxe a Feira Internacional de Emprego Universitario, Finde.U, que terá continuidade os vindeiros 24 e 25 de outubro no Ifevi de Vigo. A feira organizada polas universidades de Vigo, Porto e Tras-Os-Montes ten o obxectivo de achegar a oportunidade ao seu alumnado e egresadas e egresados de manter un contacto directo con empresas que demandan talento universitario.

Ofertas de emprego, prácticas, bolsas ou traballos ocasionais; procesos de selección a medio e longo prazo; entrevistas ás e aos candidatos seleccionados e sesións informativas e obradoiros, conforma a oferta que a Finde.U.

[+info](#)

Bota a andar un novo curso para as 327 alumnas e alumnos do Programa Universitario de Maiores en Vigo



O Programa Universitario de Maiores, PUM, arranca este curso con preto de 567 alumnas e alumnos e, deles, 327 fano no campus de Vigo. Mañá xoves celebran o seu acto de apertura de curso, un dos intreos máis emotivos do ano, xa que como sinala Marina Troncoso, presidenta das Aulas de Formación Aberta, "é o momento para entrar en contacto coas persoas que comezan no programa e de reencontro entre os que xa levamos moitos anos". Levan semanas preparando este acto con esmero e nesta particular posta de longo o alumnado máis veterano do campus estará arroupado por numerosos membros da comunidade universitaria.

[+info](#)

Alterarte amosa no Marcos Valcárcel os fondos doados polos artistas que participaron en 'Estado Crítico 2'



Entre xaneiro de 2013 e agosto de 2015, a sala de arte contemporáneo do campus de Ourense, a Sala Alterarte, desenvolveu o proxecto expositivo *Estado Crítico 2. 10 Comisarios 10 Artistas*. Ao seu abeiro, foi acollendo once mostras doutros tantos creadores curadas por profesores da Universidade de Vigo. Ao longo deste tempo e como xa vén sendo tradición neste espazo, cada un dos artistas participantes doou unha obra súa á colección da sala universitaria. Este mércores inaugurouse no Centro Cultural Marcos Valcárcel da Deputación de Ourense a mostra *Estado Crítico 2 na Colección Alterarte* ao mesmo tempo que se presentou o seu catálogo.

[+info](#)

A creación de redes semánticas, unha chave para a aprendizaxe das persoas con trastorno autista



As persoas con trastorno do espectro autista (TEA), explica o profesor da Universidade de Vigo Manuel Ojea, presentan "limitacións en relación ao proceso de percibir, seleccionar, procesar, codificar e recuperar a información procedente do medio, o que inflúe no proceso de adquisición dun nivel perceptivo axeitado sobre a identidade persoal e autoconcepto así como nos diferentes niveis de autonomía e capacidades de resposta". Abordando esta cuestión, no seu último libro, presentado este xoves no campus de Ourense, o doutor en Psicopedagogía afondou no marco teórico do procesamento perceptivo-cognitivo neste colectivo mediante a creación de redes semánticas.

[+info](#)

O mito da libre elección como instrumento para perpetuar o patriarcado



Este xoves as *Xornadas Feminismo e Teoría do Dereito* arrancaron nos campus de Vigo e Ourense cunha conferencia da profesora da Universidad Rey Juan Carlos de Madrid Ana de Miguel. A filósofa e feminista compartiu primeiro con alumnado da Facultade de Dereito e despois con estudantes da Facultade de Ciencias Xurídicas e do Traballo a súa visión sobre o feminismo e a desigualdade de xénero, abordando entre outros temas o mito da libre elección como instrumento para perpetuar o sistema patriarcal. As xornadas contan con financiamento da Unidade de Igualdade.

[+info](#)

Na procura de canles para levar a investigación educativa á sociedade



Integrada por sete grupos de investigación, que teñen como nexo común o traballo no eido da inclusión social, a Rede RIES realizou un estudo bibliométrico sobre a investigación educativa feita en Galicia entre 2012 e 2014. Unha das principais conclusións daquel traballo foi, como salienta a súa coordinadora, María del Mar Lorenzo, "que os investigadores tiñamos que facer un maior esforzo por difundir o noso traballo dunha forma moito máis axeitada". Achegarlles diferentes ferramentas e dinámicas para divulgar os seus traballos é o principal obxectivo das Xornadas de Investigación que este xoves se desenvolven no campus.

[+info](#)

A Universidade “guiará” ao Concello na argumentación científica e económico-social da candidatura de Cíes a patrimonio da humanidade



O Auditorio Mar de Vigo acolleu este mediodía o acto de presentación dos comités, coordinados pola Universidade de Vigo, que proveerán ao concello vigués dos argumentos científicos e económico-sociais da candidatura das Illas Cíes a patrimonio da humanidade da Unesco. Unha trintena de investigadoras e investigadores das tres universidades, centros e institucións galegas conforman os comités científico, coordinado polo catedrático Emilio Fernández e o económico-social, dirixido pola tamén catedrática da institución académica viguesa Dolores Garza e aos que se suma un terceiro comité técnico, conformado por persoal municipal. O alcalde de Vigo, Abel Caballero, e o reitor da Universidade de Vigo, Salustiano Mato, presidiron a presentación dos grupos de traballo, integrados, segundo Mato “polas e polos mellores para determinar o rumbo para protexer as Illas Cíes.

[+info](#)

Tradutoras e intérpretes achegan, desde a perspectiva de xénero, novas olladas da súa profesión



De que maneira se neutralizan contidos igualitarios no proceso de dobraxe dunha película? Que oportunidades e desafíos presenta a interpretación telefónica en casos de violencia machista? Que tipo de problemas de comunicación se dan nos xuízos mediados por intérpretes, incluídos os de violencia de xénero? Estas son algunhas das preguntas as que se tratou de dar resposta na *II Xornada Investigación en tradución e interpretación: novas olladas dende a perspectiva de xénero*, unha actividade organizada polo Grupo de Investigación Bifega (Investigación en Estudos Literarios e Culturais, Tradución e Interpretación) en colaboración coa Unidade da Igualdade.

[+info](#)

Maricastaña levará a Tánxer 'A última cornixa do mundo'



Este mércores, o campus de Ourense acolleu a presentación das catro aulas de teatro universitario, dos grupos que ao longo deste curso académico 2017/2018 se formarán nas artes escénicas e levarán a cabo diferentes representacións en todo tipo de escenarios. Conformados os grupos, un deles, o terceiro nivel, o máis avanzado, afrontará a vindeira semana a súa primeira cita importante. A Aula Maricastaña actuará no Festival Internacional de Teatro Universitario de Tánxer, que se celebrará do 23 ao 28 de outubro na cidade marroquí. Nel representará o venres 27 a última peza creada neste grupo, titulada *A última cornixa do mundo*.

[+info](#)

Co compromiso de deixar de ser persoas sedentarias



Ser unha persoa nova non equivale a ser unha persoa activa. O sedentarismo, a falla de exercicio físico, é unha problemática que tamén afecta ao alumnado universitario. Co obxectivo de fomentar o deporte entre este colectivo, a Área de Benestar, Saúde e Deporte da Universidade de Vigo, ao abeiro do proxecto internacional Active Campus Europe, vén de pór en marcha unha iniciativa mediante a cal 31 persoas dos tres campus están a desenvolver durante dez semanas un plan de exercicio físico personalizado. O reto é, seguindo as recomendacións da Organización Mundial da Saúde, acadar que cada unha delas realice 150 minutos de actividade física moderada á semana.

[+info](#)

Como o espazo e o feminismo poden mudar a composición musical



Un xeito diferente de entender a composición musical, isto é o que nas xornadas de xoves e venres achegou ao alumnado de Belas Artes a compositora Lula Romero, protagonista dun obradoiro inserido no ciclo *Da arte sonora e da música contemporánea*, que o grupo de investigación DX7 promove coa colaboración de Vertixe Sonora. Rachando coa idea tradicional “da figura do compositor como un mestre que escribe a súa idea e lla dá a uns músicos que se limitan a interpretala” desde o escenario, Romero trasladou unha concepción diferente da creación sonora, vinculada a idea do espazo e poñéndoa en relación co feminismo.

[+info](#)

Especialistas hispano-italianos analizan as principais luces e sombras da industria do automóbil



En marzo de 1958 Citroën Hispania iniciou a súa actividade en Vigo co ensamblado da furgoneta Azu, versión derivada do coñecido 2CV. Hoxe, case 40 anos despois, e convertidos no Grupo PSA Vigo a fábrica está considerada un dos piares básicos da economía galega e representa o 30% das exportacións desta comunidade. A importancia deste sector, tanto a nivel local como global, non pasou desapercibida para os profesores Rafael Vallejo, da Universidade de Vigo, e Margarita Vilar, da Coruña, que decidiron centrar neste ámbito da industria o X Congreso España-Italia de Historia Económica, un encontro bilateral que se prolongará hoxe venres e mañá sábado.

[+info](#)

No camiño á igualdade, educación e dereitos



de conferencias *Unha mirada de xénero* que se está a desenvolver nos campus de Pontevedra e Ourense.

[+info](#)

20 investigacións interdisciplinares inician o seu camiño ao abeiro do Campus CREA S2i



20 investigadoras e investigadores procedentes de eidos como a comunicación, a bioloxía, a xestión pública, a enxeñaría forestal ou a moda integran a primeira promoción do programa de doutoramento en Creatividade e innovación social e sustentable, que este martes celebraba a súa posta en marcha coa celebración dun seminario sobre liñas de investigación na Casa das Campás. Tras cubrir o máximo de prazas dispoñibles, un total de 20, o “primeiro produto académico do Campus CREA S2i”, como salienta o vicerreitor do campus, Juan Manuel Corbacho, promoverá a realización de 20 teses definidas polo seu carácter interdisciplinar.

[+info](#)

Cinema en primeira persoa para achegarse á muller detrás da cámara



Unha escolma de fotografías domésticas de mulleres anónimas, mercadas en rastros e mercados, integran *Relecturas da feminidade*, unha exposición na que, co patrocinio da Unidade de Igualdade da Universidade, a profesora e decana de Belas Artes, Silvia García, propón unha reflexión sobre a pose adoptada por mulleres de diferentes idades e países ao situarse diante dunha cámara. Reflexión ten un complemento poñendo o foco do outro lado do obxectivo, detrás da cámara, que é precisamente o propósito dos coloquios e obradoiros que o mércores 25 e o xoves 26 protagonizan nesta facultade as realizadoras Xisela Franco e Andrea Zapata.

[+info](#)

A Finde.U bota a andar en Vigo con máis de 1000 ofertas de emprego e prácticas para estudantes e titulados



Está este currículo ben feito? Onde o envío? Como me achego a unha empresa? Como debo falarlles ás e aos empregadores? Estas son cuestións ás que millóns de estudantes e tituladas e titulados universitarios se enfrontan á hora de tratar de acceder a un posto de traballo ou mesmo a unhas prácticas profesionais nunha empresa ou institución. Dar a resposta máis axeitada a este tipo de preguntas, a través de persoas expertas na materia, e coñecer cara a cara coas e cos representantes de máis de 60 empresas de sectores diversos, radicadas en Galicia e Portugal, que é o que estas firmas requiren para contratar ao seu persoal, é posible este martes e mércores na 2ª edición da Feira Internacional de Emprego Universitario.

[+info](#)

O campus retoma a súa cita cos Martes Saudables



Como vai a miña glicemia? Que método anticonceptivo é o que mellor se axusta ás miñas necesidades? Que podo facer para evitar comer determinados alimentos cando teño moita ansiedade? O meu índice de masa muscular é o axeitado? A comunidade universitaria do campus tivo hoxe unha nova oportunidade de achegarse a un dos postos dos Martes Saudables, unha cita xa clásica no calendario universitario que dá a oportunidade, tanto ao alumnado como ao persoal, de dedicar un anaco da mañá a comprobar, aínda que sexa de xeito moi xenérico, como está a súa saúde.

[+info](#)

A Finde.U pecha a súa segunda edición con preto de 1000 asistentes



Cunha cifra de asistentes moi semellante á da pasada edición, máis de 60 empresas e institucións participantes e cheo total nos obradoiros formativos, este mércores baixou o pano no Ifevi a Finde.U, Feira Internacional de Emprego Universitario 2017. Esta cita coa inserción laboral do alumnado e as persoas egresadas, organizada polas universidades de Vigo, Porto e Tras-os-Montes e Alto Douro, consolídase como un referente na eurorrexión Galicia e norte de Portugal contando coa participación de arredor de 1000 estudantes e titulados que se achegaron aos postos das empresas este martes e mércores e participaron nas diversas actividades formativas e de asesoramento. A vicerreitora de Estudantes, Dolores González, remarca a diversificación de sectores presentes na feira, abríndose a compañías máis aló do eido tecnolóxico ao empresarial, xurídico e comercial. Destaca tamén o éxito que acadaron actividades como os talleres de elaboración de currículos, de preparación de entrevistas de traballo, presentacións corporativas ou o *Talent at Work*, celebrado esta mañá con todas as prazas cubertas.

[+info](#)

Un modelo estatístico permite predicir as zonas do monte con maior risco de sufrir os lumes máis graves



Factores como a forza e a dirección do vento, o tipo de vexetación ou a existencia de pendentes resultan determinantes para que un incendio forestal cause maiores danos nas masas arbóreas. Co propósito de predicir que zonas de monte serán máis proclives a sufrir "lumes de alta severidade", aqueles nos que as lapas afectan ás árbores na súa totalidade, o profesor da EE Forestal José María Fernández desenvolveu, xunto con investigadores do CIF Lourizán e da Politécnica Superior de Enxeñaría da USC, un modelo estatístico que, en base a unha serie de variables topográficas, meteorolóxicas e relativas aos combustibles vexetais, diferencia que parcelas son máis proclives a sufrir este tipo de lumes.

[+info](#)

Expertos en enerxía, medio ambiente e desenvolvemento sostible daranse cita no primeiro obradoiro anual da Cátedra Fenosa



Académicos, representantes do mundo da empresa e dos medios de comunicación e decisores políticos daranse cita o vindeiro venres 3 de novembro na sede viguesa da Fundación Barrié no primeiro obradoiro anual da Cátedra Fenosa. Co obxectivo de contribuír a difundir entre a sociedade o coñecemento académico xerado en temáticas como enerxía, medio ambiente e desenvolvemento sostible, o obradoiro servirá de punto de encontro e debate entre as e os representantes de diversos ámbitos.

[+info](#)

Case un centenar de estudantes participa na feira de orientación laboral de Dereito



e futuras xuristas.

Por segundo ano consecutivo, a Facultade de Dereito do campus de Ourense celebrou este venres Orienta Iuris, a Feira de Emprego Xurídico Galicia-Norte de Portugal, unha iniciativa pioneira no sistema universitario galego segundo recalcaron os seus promotores. Case un centenar de estudantes e unha vintena de entidades públicas e privadas se deron cita nun foro que tivo como obxectivo fomentar a empregabilidade dos futuros

[+info](#)

Arranca unha nova edición de Conversas en Empresariais promocionando o autoemprego feminino



Patricia Araque é unha emprendedora fondamente comprometida coa igualdade e a promoción do autoemprego feminino, con particular atención ao uso das novas tecnoloxías. O seu caso serviu este venres de exemplo para as novas xeracións de alumnas e alumnos da EU de Estudos Empresariais que asistiron á Xornada A diversidade na empresa: recursos humanos e igualdade, punto de arranque da segunda edición do ciclo Conversas en Empresariais.

[+info](#)

Campus do Mar e Adegas chaman á participación cidadá para limpar unha vintena de areas galegas



Tapóns, bolsas, anacos de redes ou de cordas de nailon, son exemplos de restos de orixe plástico que alén do seu impacto visual supoñen un perigo para a fauna e a flora mariña e mesmo representarían, pola súa transferencia trófica, un risco para os seres humanos. Co obxectivo de dar a coñecer a problemática ambiental do lixo mariño que afecta a todos os mares e océanos do planeta e contribuír a minimizar este impacto Campus do Mar e o Centro de Investigacións Mariñas da Universidade de Vigo e Adegas, organizan o vindeiro 11 de novembro unha limpeza simultánea nunha vintena de praias galegas.

[+info](#)

O proxecto Life Seacan comeza a instalación dos prototipos para o tratamento das augas residuais das industrias conserveiras



Galicia é o primeiro produtor conserveiro europeo e o segundo mundial, tras Tailandia. En 2016 producíronse case 350.000 toneladas de conservas pero esta industria precisa preto de dous litros de auga por cada lata que produce, isto é 8,6 millóns de metros cúbicos ao ano. En consecuencia, o 12% dos vertidos de auga ás rías proceden das industrias conserveiras. Para analizar o seu impacto nos sistemas bentónicos das rías e mellorar a calidades destas augas residuais, en 2015 botou a andar o proxecto Life Seacan, coordinado por Cetaqua Galicia e Cetaqua Barcelona en colaboración coas universidades de Vigo e Santiago. Este venres, o campus de Vigo acolleu o segundo workshop do proxecto no que participaron especialistas das entidades socias para presentar os avances do proxecto.

[+info](#)

Seis exposicións traerán o Outono Fotográfico ao campus



85 exposicións, 280 autores e autoras, 66 espazos expositivos, 22 cidades de Galicia e Portugal e 85 entidades colaboradoras. Con estas cifras presentouse este luns no Liceo de Ourense unha nova edición, a 35, do festival Outono Fotográfico. Como xa vén sendo tradición, o campus de Ourense únese a esta iniciativa cultural tanto como entidade patrocinadora como acollendo varias das mostras que se desenvolverán no seu marco.

[+info](#)

‘El Pliego’ pecha en Madrid, Porto e Serbia a súa viaxe polo mundo



Un total de 224 obras, realizadas por alumnado de 17 facultades e centros formativos de once países, reúnen en *El Pliego / Le Pli / A Folder*, o proxecto internacional de edición gráfica que coordinan as investigadoras do grupo dx5 (digital & graphic art research) da Facultade de Belas Artes Anne Heyvaert e Ana Soler. Un proxecto que deu pé nos últimos meses a un total de 14 exposicións, promovidas polas diferentes institucións participantes, e que nestes días fai posible que os traballos realizados polo alumnado se exhiban de xeito simultáneo en Madrid, Porto e na cidade serbia de Novi Sad.

1800 investigadoras e investigadores de preto de 200 grupos nun clic



Un escaparate das capacidades da I+D+i que se fai na Universidade de Vigo. Isto é BIDI, o buscador da institución académica viguesa, que este mediodía foi presentado publicamente e ao que xa se pode acceder a través do enderezo electrónico bidi.uvigo.es. "BIDI permitirá ter máis claras as capacidades da nosa comunidade investigadora", asegurou o reitor da Universidade de Vigo, Salustiano Mato, que incidiu na importancia desta ferramenta "que permitirá poñer en valor o noso traballo e que a sociedade poda buscar solucións a problemas de I+D+i". O buscador inclúe uns 1800 investigadoras e investigadores de preto de 200 grupos de todos os ámbitos do coñecemento.

[+info](#)

A obra de Martin Codax e o Pergamiño Vindel baixo a lupa dunha ducia de expertos mundiais



Cunha conferencia inaugural titulada *Martin Codax y la poesía de su tiempo* a cargo do docente e investigador da Sapienza Universidade de Roma Vicenç Beltran Pepió, comezará o vindeiro 23 de novembro o simposio internacional *E irei madr'a Vigo*. A cita académica, organizada polo Departamento de Filoloxía Galega e Latina da Universidade de Vigo co gallo da presenza do Pergamiño Vindel en Vigo, reunirá durante dous días na cidade, a expertos procedentes de varios puntos do planeta.

[+info](#)

A Universidade participa nun proxecto europeo que busca solucións "económicas e eficaces" para a recuperación de residuos industriais



A Universidade de Vigo é un dos sete socios do proxecto europeo PortableCrac, un consorcio no que participan sete empresas e institucións de España, Italia e Portugal e que ten como principal obxectivo o desenvolvemento dunha tecnoloxía ecolóxica e economicamente beneficiosa para rexenerar o carbón activo empregado na actualidade para a descontaminación e filtración de auga, tanto na pequena como na gran industria, un tema que a propia Unión Europea recoñece como de vital importancia dado que falamos dun recurso, moi limitado e valioso, como é a auga.

[+info](#)